

Headlines

1. कटरा-कश्मीर रेल सेवा दा उद्घाटन करने लेई प्रधानमंत्री नरेन्द्र मोदी हुंदे जम्मू-कश्मीर दे प्रस्तावित दौरे गी खराब मौसम दी पेशगोई दे चलदे अगड़ा पाई दित्ता गेआ ऐ।
2. मुखमंत्री ओमर अब्दुल्ला होरें ई-सेहत ऐप्प दा उद्घाटन कीता ऐ जेहड़ी जम्मू-कश्मीर दे बसनीकें लेई सेहत सेवाएं दी दस्तयाबी सखल्ली बनाग।
3. सुप्रीम कोर्ट नै टोल शुल्क गी 80 फीसद घटाने दे जम्मू-कश्मीर हाईकोर्ट दे हुकमै पर स्टे लाई दित्ता ऐ।
4. न्याऽमूर्ति अरूण पल्ली होरें जम्मू-कश्मीर ते लद्दाख हाईकोर्ट दे मुख न्याऽधीश दे तौर उप्पर संगंध चुक्की।
5. राश्ट्री जांच एजेंसी जम्मू दी बशेश एनआईए अदालतै च इक पाकिस्तानी हैंडलर सने कुल 3 आतंकवादिएं दे खलाफ आरोप-पत्तर दायर कीता ऐ।

<><><><><><>

PM-Visit

कश्मीर थमां कटड़ा बश्कार रेल सेवा दा 19 अप्रैल गी प्रधानमंत्री नरेंद्र मोदी हुंदे आसेआ उद्घाटन कीता जाना हा, पर हून इस कार्यक्रम गी अगड़ा पाई दित्ता गेआ ऐ। एहू बदलाव मौसम विभाग आसेआ 18 थवां 19 अप्रैल बश्कार जम्मू-कश्मीर च भारी बरखा ते खराब मौसम दे चलदे कीता गेआ ऐ। रेलवे मंत्रालय नै सोशल मीडिया दी इक पोस्ट च इस बारै जानकारी दित्ती ते आखेआ जे अगली तरीक बारै जानकारी तौले गै दित्ती जाग। इत्थे एहू दस्सना लाजमी ऐ जे प्रधानमंत्री नरेंद्र मोदी हुंदे आसेआ उधमपुर-श्रीनगर-बारामूला लिंक दे खीरी सैक्शन दा उद्घाटन कीता जाना हा।

<><><><><><>

CM-e Sehat

मुख्यमंत्री उमर अब्दुल्ला होंरें अज्ज ई-सेहत ऐप दी शुरूआत कीती। एहू इक डिजिटल मंच ऐ जेदा मकसद जम्मू-कश्मीर च सेहत सेवाएं दी दस्तयाबी गी बेहतर करना ऐ। इसी नागरिकें, डॉक्टरें ते मेडिकल पेशे कन्नै जुडे दे लोकें लेई तैयार कीता गेआ ऐ। इसी ऐसे ढंग्गै कन्नै बनाया गेआ ऐ जेदे राएं लोकें गी सखल्ले सेहत सहूलतां हासिल होना। एहूदी शुरूआत दे मौके पर बोलदे होई मुख्यमंत्री उमर अब्दुल्ला होंरें आखेआ जे इस डिजिटल पहलकदमी कन्नै सेहत सेवाएं च सुधार होग, उन्दे च बदलाव होग। म्यारी सेवा सब्बनें गी उपलब्ध होग। एहूदे राएं एम्बुलेंस दी जानकारी अस्पताल ते प्रतिक्रिया बारै सरिस्ता बी उपलब्ध ऐ। एहू ऐप मेडिकल विद्यार्थिंए लेई बी सहायक ऐ।



SC-Stay

सुप्रीम कोर्ट नै मंगलवारें जम्मू-कश्मीर ते लद्दाख हाई कोर्ट दे उस हुक्मै पर रोक लाई दिती ऐ जेदे च राष्ट्रीय जरनैली शिडक एन.एच-44 पर टोल टैक्स च 80 प्रतिशत दी कमी कीती गेई ही। हाई कोर्ट नै पैहले एहू फैसला सनाया हा जे सडक निर्माण दा कम्म अजें बी पूरा नेई होने पर टोल टैक्स वसूलना जायज नेई ऐ। जस्टिस अभय एस. ओका ते जस्टिस उज्जवल भुयान दी पीठै कल भारतीय राष्ट्रीय जरनैली शिडक प्राधिकरण एनएचए-1 आसेआ दायर इक अर्जी पर सुनवाई करदे होई खीरी हुक्म पास कीता। अगली तरीक 19 मई 2025 पाई गेई ऐ।



Kathua Arms Recovered

इक बड्डी कामयाबी दे तैहत, सुरक्षाबलें कठुआ जिले च टाक्करे आहली थाहै थमां खरी मती मात्रा च थेआर-असलाहू ते गोला-बरूद बरामद कीता ऐ। कठुआ दे एसएसपी शोबित सक्सेना होंरें अज्ज इक संवाददाता सम्मेलन दरान दस्सेआ जे बरामद कीते गेदे थेहारें च इक एम4 राईफल, 2 एके. रफलां, इक पस्तौल, केई सारी मैज़गीनां ते खरी मती मात्रा च गोला-बरूद, पाकिस्तानी झोले ते किश दवाइयां बी शामिल ना। इस सरबंध्यै च अगड़ी तफ्तीश जारी ऐ।



Search-Operation

पुंछ जिले दी सुरनकोट तैहसील दे लसाना ग्रांड च अज्ज उप्परोतली त्रीये ध्याड़े बी सुरक्षाबलें आसेआ बड़े स्तरै पर चलाया गेदा सांझा तुपाई अभियान बरोबर जारी ऐ। जंदे सोमवारें इलाके च मुश्तवा आतंकवादिएं कन्नै होई दी गोलीबारी दे मगरा सुरक्षाबलें आसेआ एहू अभियान रम्भेआ गेआ हा। तदूं थमां गै इलाके च फौज ते पुलस दे जवानें दी मजूदगी बधाई दिती गेदी ऐ ते उ'नेंगी हाईअलर्ट पर रक्खेआ गेदा ऐ। घने जांगली इलाके च छप्पे दे आतंकवादिएं दा पता लाने लेई ड्रोन दी मदाद कन्नै इलाके गी खंगालेया जा'रदा ऐ।

<><><><><><>

CJ Palli Oath

न्यायधीश अरूण पल्ली होरें अज्ज जम्मू-कश्मीर ते लद्दाख हाई कोर्ट दे मुख् न्याधीश दे तौरा पर सगंध लैती। उनेंगी उपराज्यपाल मनोज सिन्हा होरें इक कार्यक्रम दौरान सगंध दोआई। सगंध समारोह च मुख्मंत्री उमर अब्दुल्ला, हाईकोर्ट दे जज ते होर दुए मन्ने-परमन्ने दे लोक शामिल होए। हिमाचल प्रदेश हाई कोर्ट दे मुख् न्यायधीश बी इस मौके पर मौजूद हे।

<><><><><><>

NIA-Chargesheet

राष्ट्रीय जांच एजेंसी एनआईए नै बन्ने आहले जिले पुंछ च हथियार ते गोला-बरूद कन्नै जुडी दी आतंकवादी साजिश आहले मामले च इक पाकिस्तानी हैंडलर सने त्रै आरोपिं खिलाफ आरोप पत्र दायर कीता ऐ। जम्मू च एनआईए दी विशेष अदालतै सामने आरोप पत्र दायर कीते गो। जिनें आरोपिं खिलाफ आरोप पत्र दायर कीता गेआ उन्दे च अब्दुल अजीज, मुनव्वर हुसैन ते नजीर हुसैन शामिल ना। प्रतिबंधित जम्मू-कश्मीर गजनवरी फोर्स नां दे आतंकवादी संगठन च कम्म करने आहला नजीर हुसैन इस्सलै पाकिस्तान दे नजैज कब्जे आहले जम्मू-कश्मीर च सक्रिय ऐ। एहदे पर कथित तौर पर आरोप ऐ जे एहू मुकामी लोकें गी हिंसा ते हथियारें दी सप्लाई लेई उक्सांदा हा। अक्तूबर 2024 च अजीज थवां ग्रेनेड बरामद होए हे ते एहू मामला ओदे गै सरबंध्य च ऐ।

<><><><><><>

Tawi-Aarti

जम्मू म्युनिसिपल कार्पोरेशन तवी दे कंडे पर तवी आरती गी नियमित तौर पर करोआने दी योजना बना रदी ऐ। खास करी औंदी अमरनाथ जी दी जात्तरा दे मद्देनजर एहू घोषणा तवी दे कंडे बूटे लाने आहली इक मुहिम दौरान कीती गई। एहूदे च अफसरें स्वयं सेविणं ते मुकामी बसनीकें दी बड़ी मती सक्रिय शमूलियत दिक्खी गई। जेएमसी दे आयुक्त देवांश यादव होरें आखेआ जे इस जत्त दा मकसद शैहर च आध्यात्मिक माहौल ते धार्मिक सैलसफा गी बढ़ावा देना ऐ।



Doda Camp

सेहत दिक्खभाल आहली इक बड़ी पैहलकदमी दे तैहत, जिला प्रशासन डोडा आसेआ रोटरी क्लब इंटरनेशनल दे सैह्योग कन्नै इक बड़े सर्जिकल कैंप दा आयोजन कीता जा'रदा ऐ जेहदा मकसद आम लोकें गी माहिराना डाक्टरी सेवां उपलब्ध करोआना ऐ। डोडा दे डिप्टी कमिशनर हरविंदर सिंह होरें इस कैंप बारै ब्यौरे सांझे करदे होई दस्सेआ जे सेहत मैहकमे दी टीम आसेआ इस सरबंध्यै च व्यापक जांच दा कम्म तोढ चाढेआ गेआ ऐ ते सर्जिकल प्रक्रियाएं लेई तकरीबन 500 मरीजें दी ताल कीती गई ऐ।



Rajouri Nasha Mukht

जिला प्रशासन रजौरी आसेआ अज्ज जिले दे सब्भनें ब्लाकें च नशामुक्त जम्मू-कश्मीर अभियान दा आयोजन कीता गेआ। एहदा मकसद लोकें गी नशे दे माडे नतीजें बारै जागरूक बनाना ते नशा-मुक्त समाज दे निर्माण गी बढ़ावा देना हा। इस सरबंध्यै च केई सारी गतिविधिं जि'आं रैलिं, सेमीनारें ते सलाह-मशवरे आहले सत्रें दा आयोजन कीता गेआ जि'दे च खरी मती गिनतरी च विद्यार्थिं, नौजवानें ते मुकामी लोकें हिस्सा लैता। सरबंध्यत अधिकारिं, समाज चा नशे दी कवैतू गी पूरी चाल्ली खत्म करने लेई सामुदायिक हिस्सेदारी दे महत्वै पर जोर पाया। जिला प्रशासन नै रजौरी च नौजवानें गी नशे दी लत्त थमां बचाने ते उं'दा भविक्ख सुरक्षित करने लेई नेहूी पैहलकदमिं दे आयोजन लेई अपनी वचनबद्धता गी पही पक्का कीता ऐ।